

Dr Winnetou hylt uff sym Ross  
und mit ihm grad dr ganzi Tross  
Tim, Struppi, Globi und Wild Maa  
dr Moby Dick kunnt hindedra  
d Knuschperhäx und s Krokodil  
sogar dr Käschperli isch still  
johrhundertlang hett me si gläse  
und verehrt als bsunderi Wäse  
jetz sin sy gächtet, mi en sich schämme  
dr Pöbel riefet nur «Adie zämme»

E dummi, glaini Minderhait  
hett dr Kultur dr Kampf agsait  
die Memme haut s scho uss de Sogge  
drait e Bärner Rastallogge  
dr Faust vom Goethe deent z brutal  
dr Santiglaus isch z klerikal  
Schwarzbuebeland deent kolonial  
e Männerchor isch e Skandal  
e Blatz abiete isch jovial  
und jedes Komplimänt deent schal  
me fyhlt sich unwohl und pikiert  
wenn ebber d Wiehnacht zelebriert  
bim «Prosit der Gemütlichkeit»  
hett d Droge-Prävention versait  
e Hot Dog isch Dierquälerei  
e Metzgete e Sauerei  
bi jedem Wurschtsalat muesch heere  
dä Abligg kennt d Veganer steere  
kunnt emol e Diefdruckzone  
wott me s Volgg drvor verschone  
doch wird e Fyrwehr attackiert  
haisst s z Berlin, s isch nyt bassiert

D Qualitet isch hitt nimm wichtig  
denn sinn s Gschlächet und d Hutfarb richtig  
hesch in Basel Brugge bsetzt  
bisch fir jedes Amt fascht gsetzt  
hitt wott aifach jedes Lysy  
bim Verwaltigsrot drby sy  
hesch kai schlächti Jugend kai  
und bisch z letschemänd e Ma  
bisch nit schwarz, nit wiescht, nit dumm  
nämme dir die Lyt das krumm

Anonymi Sittewächter  
mache d Wält statt besser schlächter  
gnau glych mache s Taliban  
däne in Afghanistan  
gsehsch dert kain mit Rastallogge  
im Paschtunetämpel hogge  
und me schitzt die dumme Buure  
vor de gefährliche Kulture  
s fyhlt sich dert au niemer gsteert  
dass ain fremdi Musig heert  
s brucht s veganer Menu nit  
well s dert doch nyt z ässe git  
dr Genderstärn käsch au lo blybe  
s kai ja doch fascht niemer schrybe  
s wird kai Frau im Büro gmobbt  
well si sowiso nit jobbt  
e Gender WC bucht s e kains  
s ganz Land het ainewäg nur ains

Afghanistan, de merggsch es gly  
miesst fir uns e Vorbild sy  
fir all die Sittebolizistische  
wo ihr drurig Doo-sy frische  
und als neyi Regle wänn  
wie mir hitte z Läbe hänn

Me-too schitzt letschtlig nur s Interässe  
em Exmaa no meh Gäld z erprässe  
es kenne sich jo doch die maischte  
so Verfahre gar nit laische  
und Woke verhindret Diskussione  
zem go Minderhaite schone  
wo sich nit im Gringschte steere  
dass si dert drzue dien gheere  
kai Genderstärnli git dr a  
was e Mensch denn laische kai

Kultur a-aigene: s bescht wos s git  
sunscht hätte mir dr Fortschritt nit  
denn ohne Usdusch vo Kulture  
wäre mir no hitt Lemure  
es brucht doch, dass me konkurriert  
und fremdi Sache usprobiert  
vom Babbyr bis ABC  
vom Couscous bis zem griene Tee  
vom Free-Jazz bis zem Domino  
stammt im Grund gno nyt vo do

Drum heeret mit dem Schwachsinn uff  
so Shitstorm mache ys nur muff  
ihr mi ent d Wält nit vor sich behiete  
wenn ihr ys alles wänn verbiere  
sunscht säge mir ganz unverhohle  
es soll eych doch dr Deyfel hole

Das darfsch nit sage, so ne Mischet  
sunscht giltsch am And als Satanischt



HAALT D SCHNURRE!  
G  
M  
B



zem Audio-Zeedel, oder  
[www.bmg1907.ch](http://www.bmg1907.ch)

# Basler Mittwoch-Gesellschaft 1907